

Broj: 20

Juni, 2023.godine

Pazarko



Riječ urednika

Poštovani čitaoci i čitateljke školskog lista "Pazarko", pred kraj prvog polugodišta školske 2022/23. godine, srdačno vas pozdravljaju članovi Novinarske sekcije Osnovne škole "Pazar". Za ovaj broj "Pazarka" odlučili smo predstaviti učenike i učenice, naše škole, koji su se istakli u vannastavnim aktivnostima kao i aktivnostima izvan okvira naše škole. Pratili smo i kulturna dešavanja u našoj školi. Nadamo se da ćete uživati u ovom broju i da ćete pronaći nešto za sebe. Uposlenicima i učenicima JU OŠ "Pazar" redakcija "Pazarka" čestita uspješan kraj 2. polugodišta školske 2022/23. godine.

U ovom broju možete pročitati:

- ⇒ Zašto je važno čitati djeci?
- ⇒ Značajne manifestacije...
- ⇒ Sa maturalne ekskurzije...
- ⇒ Intervjui sa...
- ⇒ Časovi izvan učionice
- ⇒ Literarni i likovni radovi učenika
- ⇒ Dan škole
- ⇒ Takmičenja

IMPRESUM

IZDAVAČ—JU OŠ "Pazar" Tuzla

juni, 2023. godine

ZA IZDAVAČA—Seid Nožinović, direktor škole

Glavni i odgovorni urednici:

Edina Šehić, Jasmina Bajrektarević i Melika Suljagić.

Redakcija školskog lista *Pazarko*:

Ajna Nezirovac, Adna Babović, Luna Jajčanin, Harun Sejranić

Zašto je važno čitati djeci i poticati čitanje u kasnijoj dobi?

Mjesec oktobar, osim što je ove godine bio obojen divnim bojama zlatne jeseni, u našoj školi u okviru redovne nastave, bio je i mjesec knjige i čitanja. Podsjetili smo se koliko je čitanje važno za razumijevanje nastavnog sadržaja i koliko koristi imamo od čitanja.

Čitanje djetetu korisna je aktivnost u kojoj može učestvovati

bilo koji od članova porodice, a donosi brojne prednosti za djetetov socijalni, intelektualni i emotivni razvoj. Vrijeme posvećeno djeci, i čitanju prije spavanja ili nekoj drugoj prisnoj situaciji ne bi smio biti luksuz ili samo izuzetak, nego ustaljena navika u odgoju djece. Od prvih slikovnica do zbirke bajki, basni, kasnije i

romana na časovima lektire u višim razredima – u svakoj od knjiga krije se važna pouka i u nju su utkane životne vrijednosti koje je potrebno prenijeti djeci.

Razgovorom o različitim situacijama u kojima se nalaze likovi iz priča, razgovorom o pronalaženju rješenja za takve situacije, u kojima se često djeca prepoznaju i poistovjećuju, prepoznavanjem pozitivnih i negativnih karakteristika likova, razvija se i potiče ono što danas često čujemo – kritičko mišljenje djeteta. Nadalje, čitanje pomaže u razvijanju dječije kreativnosti.

Dok čitamo djetetu, dok sluša priču ili je samostalno čita, dijete će pokušati zamisliti likove, mjesta, događaje.

Tako nerijetko, plavokosa Alisa iz romana *Alisa u zemlji čudesa* u dječijoj mašti ne mora uvijek biti plavokosa djevojčica, avanture Haklberi Fina mogu biti zamišljene na nekoj od naših bosanskih rijeka ili jezera, a iznenadit ćete se kakvu bi ilustraciju Ježurkine kućice nacrtalo. Čitanjem postavlja pitanja i istražuje pojmove koji su mu strani, potičemo razvoj

njegovog vokabulara. Dok čitamo djetetu, često će se naići na različite emocije nastale iz određenih situacija opisanih i predstavljenih u pričama. Iz takvih situacija djeca razvijaju empatiju. S obzirom na to da se u knjigama susreće s različitim likovima, različitih oblika ponašanja koje krasi različite osobine, dijete počinje razvijati i svijest o različitosti.

To mu kasnije pomaže u shvaćanju i prihvaćanju različitosti među svojim vršnjacima i ljudima općenito. Čitanjem djeca upoznaju maternji jezik, njegove zakonitosti, shvaćaju važnost lijepoga izražavanja. Razgovorom o knjizi djeca razvijaju vlastite komunikacijske vještine. Slušanjem zanimljive priče dijete će se, prvenstveno zbog znatiželje, truditi da pažljivo prati tok događaja. Slušajući priču također će i pokušati vizualizirati situaciju. Tokom procesa slušanja i vizualizacije potičemo razvoj dječije koncentracije, što je iznimno korisno za proces učenja.

U konačnici, svaka knjiga za djecu je kao jedna pomoćnica u odgoju djeteta. Gotovo za svaku životnu situaciju ili neki problem napisana je priča, bajka ili basna prilagođena uzrastu djeteta. Čitanjem priča, koje sadrže problem s kojim se dijete u životu susreće, odgajate dijete i učite ga važnim životnim vrijednostima.

(Tekst priredila Melika Suljagić, prof. bosanskoga jezika i književnosti)

Značajne manifestacije u našoj školi

„Najbolji učitelji ujedno su i najzahtjevniji učitelji: oni od učenika zahtijevaju razmišljanje.“ (W. Glasser)

Osnovna škola „Pazar“ zajedno sa Ministarstvom obrazovanja i nauke Tuzlanskoga kantona i Pedagoškim zavodom Tuzlanskoga kantona, 05. oktobra 2022. godine u



Ovu svečanost prigodnim izvedbama upotpunili su i profesori Osnovne muzičke škole Tuzla Sarah Skopljak i Elvis Sivčević.

Prateći kalendar obilježavanja značajnih datuma iz historije naše domovine, učenici Osnovne škole “Pazar” različitim aktivnostima obilježili su 26. oktobar, dan krunisanja prvog bosanskog kralja Tvrtka I Kotromanića. Podsjetili su nas na značajne historijske činjenice koje se vežu uz ime prvog bosanskog kralja:

-Za vrijeme vladavine kralja Tvrtka I Kotromanića bosanska vojska bila je najmodernija vojska na cijelom Balkanu jer je uvela u upotrebu vatreno oružje što je za to historijsko vrijeme predstavljalo veliki korak na polju vojne tehnike.

-Uz ime kralja Tvrtka stajalo je da je kralj Raške, Dalmacije, Hrvatske i primorja te je tada zabilježeno i najveće teritorijalno širenje srednjovjekovne bosanske države.

-Novac kralja Tvrtka I Kotromanića jedan je segment potvrđivanja bosanske opstojnosti i državotvornosti .

Hodnik naše škole bio je ukrašen simbolima srednjovjekovne Bosne, ljiljanima/krinovima, cvijetom koji je simbol čistote, ljubavi i nevinosti, a koji je danas prepoznatljiv dio Kotromanićevog grba.

U cilju povezivanja nastavnih sadržaja učiteljice razredne nastave sa učenicima su izrađivale krune od papira, učenici su crtali grbove srednjovjekovne Bosne, upriličeni su časovi historije u okviru časova odjeljske zajednice, te časovi historije u gradskom parku ispred spomenika Tvrtka I Kotromanića.



Bazar "Kupujmo domaće!"

Koliko je važna kupovina domaćih proizvoda i koliko je bitno da jedni druge potičemo na kupovinu domaćih proizvoda sa oznakom zvijezde i broja 387 u novembru su nas podsjetili naši učenici.

Cilj ovog prodajnog bazara je svakako jačanje svijesti, kako učenika, tako i posjetilaca prodajnog bazara o važnosti i

dugotrajnoj dobrobiti kupovine domaćih proizvoda, ali i poticanje na razvijanje određenih vještina učenika osnovne škole.

Fiskulturna sala naše škole bila je ispunjena posjetiocima do posljednjeg mjesta, a svi domaći proizvodi na malim štandovima, iza kojih su bili učenici razredne nastave, rasprodani su za pola

sata, što nas je posebno iznenadilo i obradovalo.

Hvala mnogo donatorima proizvoda, učenicima i roditeljima koji su podržali naš bazar.

Novac prikupljen sa ovogodišnjeg prodajnog bazara u cijelosti će se iskoristiti za obnovu školskog hodnika .



Međunarodni dan osoba s invaliditetom je globalna kampanja započeta 1956. godine.

Historija Međunarodnog dana osoba s invaliditetom potaknuta je nesrećom 8. augusta 1956. godine u rudniku ugljena Bois du Casier u Belgiji, kada su zbog zastarjele opreme i slabe osposobljenosti za rad osoblja u požaru na dubini od 975 metara stradala 262 rudara.

U spomen na taj događaj određeno je obilježavanje Međunarodnog dana osoba sa invaliditetom. Do 1992. godine, ovaj se dan obilježavao 21. marta. Odlukom Opće skupštine Ujedinjenih naroda donesenom u oktobru 1992. godine, kao **Međunarodni dan osoba s invaliditetom, proglašen je 3. decembra.**

Svrha obilježavanja dana je, po preporukama Komisije za ljudska prava Ujedinjenih naroda, osvijestiti stanovništvo s ciljem postizanja punog i jednakog uživanja ljudskih prava i

sudjelovanja osoba s invaliditetom u društvu.

Učenici VI₁ i VI₂ sa defektologom Mujić Azrom prigodnom radionicom, razgovorom i izradom plakata obilježili su ovaj dan te nam poslali jako važne poruke o prihvatanju osoba sa invaliditetom.



Pozdrav sa maturalne ekskurzije

Da je đачko doba najljepši period odrastanja potvrđuju i uspomene, fotografije sa maturalne ekskurzije. Ove godine, tačnije u periodu od 19. do 22. oktobra 2022. godine realizovana je ekskurzija za učenike završnog devetog razreda. Ekskurzija je obuhvatila nekoliko gradova u



Hrvatskoj (Zagreb, Rijeka, Pula, Poreč i Opatija) i bila je edukativnog karaktera, a učenici su proširili i stekli nova znanja iz historije, geografije, tehničkih grana nauke, umjetnosti, ojačali prijateljske odnose unutar razreda i stekli nova poznanstva i drugarstva, prije svega sa učenicima Osnovne škole „Centar“ s kojima su bili u grupi. U pratnji učenika naše škole bili su direktor škole Almir Dorić te nastavnica Mirela Alić.

U Zagrebu su posjetili Tehnički muzej „Nikola Tesla“, koji je

osnovan davne 1959. godine. Po samom dolasku pogledali su projekciju zvjezdanog neba sa planetama koje čine galeksije u Planetariju slušajući zanimljivo predavanje. U demonstracijskom kabinetu sami učenici bili su akteri eksperimenata koji su vodili do velikih, od svjetskog značaja, otkrića Nikole Tesle. U pratnji domaćeg turističkog vodiča učenici su upoznati sa historijatom i geografskim osobenostima Istre i užeg područja kroz koje su se vozili. Šetali su

Dekumanovom ulicom, najpoznatijom ulicom u Poreču. Potom su obišli Eufrazijevu baziliku koja je najvrjednije kulturno dobro Poreča. U Rovinju su prošetali ulicom Grisi, koja je prekrasna i predstavlja jedan od simbola grada, stepenasto se uzdiže i vodi do crkve sv. Eufemija. U ulici se svake godine održava likovna kolonija koja traje jedan dan i gdje poznati likovni umjetnici izlažu svoje radove. Vidjeli su Luk Balbi je drevni venecijanski luk koji vodi do starog grada. Izgrađen je u XVII stoljeću, a odlikuje ga prekrasna

rezbarija. Vodič, gospođa Helena, upoznala je naše učenike sa tradicijom uzgoja maslina, maslinarstvom, vinovom lozom i vinarstvom Istre. U pratnji domaćeg turističkog vodiča naši učenici posjetili su i Nacionalni park Brijuni. Izlet ka Brijunima započeo je brodom iz Fažane. Obilazak je trajao oko 3 sata, vozom su posjetili udaljeni arheološki lokaliteti: zaljev Verige, safari park, Arheološki muzej otoka. Vidjeli su i Staru maslinu, staru oko 1600 godina, životinje koje se slobodno kreću u prirodi, etno park, koji predstavlja istarsko seosko gazdinstvo, uživali u ljepotama šume hrasta crnike, četinara, lovora, makije.

Zanimljiva je bila i kula Donžon, najstarija građevina mletačkog naselja, kao i vila Pava, najstarija zgrada otoka, čuli priču o boravku Roberta Koha na otoku i istrebljenju malarije, vidjeli papigu Kokia, kojeg je Josip Broz Tito poklonio svojoj unuci za rođendan. Potom su obišli znamenitosti Pule: amfiteatar u Puli, najprepoznatljiviju građevinu Pule, izgrađenu u I stoljeću za vrijeme cara Vespazijana. U srednjem vijeku je korištena za viteške turnire, a danas se u Areni održavaju muzički koncerti, filmski festivali i sl. ...

Intervju sa učenicom Sarom Dragičević (VI₁)

Učenica VI₁ Sara Dragičević, osim odličnog uspjeha u školi niže i uspjehe na državnim i međunarodnim takmičenjima u karateu. Članica je Karate kluba



„Winner“ i iza sebe ima četiri zaredom osvojene titule državnog prvaka. Član je bosanskohercegovačke reprezentacije s kojom je već dvije godine viceprvak Balkana. Ove školske godine dobila je školsko-sportsku stipendiju kao prva na rang listi po broju bodova i uspjeha.

1. Kako se javila ideja za treniranje karatea?

Ideja se javila zbog toga što sam kao mala uvijek bila razigrana i imala višak energije pa sam tatu zamolila da me odvede u neki klub i da počnem trenirati neki od sportova.

Nakon prvog odgledanog treninga karatea, odmah sam znala da će to biti sport koji ću trenirati.

2. Koliko dugo treniraš?

Karate treniram od 6. godine i samo me još tri pojasa dijele od majstorskog zvanja.

3. Da li je bilo teških perioda u toku treniranja? Kako si prevazišla neke od teškoća ili prepreka?

U toku treniranja nailazila sam na dosta prepreka, ali sam ih sve prevazilazila svojim pozitivnim stavom, upornošću i podrškom svojih trenera. Ipak, jedan od najtežih perioda je bio za vrijeme pandemije Covid-19 kada je sve bilo obustavljeno pa i moji treninzi.

4. Na koji način se pripremaš za takmičenje?

Moje pripreme za veća takmičenja su i fizička i psihička jer karate zahtijeva dosta snage i koncentracije. Treniram 2-3 sata

dnevno šest puta u sedmici. Za moju formu zaslužni su moji treneri : Lejla Ferhatbegović–Dizdarević, Milorad Ilić i Mirsada Suljkanović–Selimović

5. Možeš li nam reći šta je karate, osim medalja, tebi donijelo?

Osim medalja karate mi je omogućilo pravilan fizički razvoj, ali i da sa klubom i reprezentacijom obiđem mnoge zemlje i upoznam različite prijatelje.

6. Zašto bi neko, prema tvom mišljenju, trebao trenirati karate?

Mislim da bi svako dijete trebalo razmisliti o karateu jer u karateu se stječe jačanje osobnosti, samopouzdanje, disciplina, kontrola, poštovanje i odgovornost.

Intervju sa kapitenom košarkaške ekipe djevojčica naše škole

U periodu decembra u vrijeme između časova i odmora zabilježili smo ovaj kraći intervju sa Zejnom Smajić, kapitenom ženske ekipe naše škole u košarci za djevojčice.

Koliko članova ima sekcija i kojim danima trenirate?

Košarkaška sekcija (djevojčice) ima oko 15 članova. Treniramo utorkom od 12:40 do 13:30, a ako se približava takmičenje onda treniramo više puta sedmično.

Koje učenice predstavljaju našu školu na takmičenjima tj. utakmicama?

Prvu postavu naše košarkaške ekipe čine: Belma Mustačević koja je na poziciji centra, zatim Emina Sulejmanović na poziciji desnog krila, Elma Valjevac na poziciji lijevog krila, desni bek je Šejma Rajs, a ja sam na poziciji plejmejкера.

Da li je teško uskladiti školske obaveze i obaveze treninga u školi?

Nije teško ako se dobro organizuje vrijeme. Sve se može kad se hoće i kad volite sport. Jako je bitna organizacija vremena i planiranje obaveza.

Na koji način se pripremate za takmičenja?

Za takmičenja se pripremamo uz pomoć nastavnika Senaida Kunića koji nam pokazuje kako da najbolje igramo i kako da se pripremimo za takmičenja. Mi se

naravno trudimo da budemo što bolje.

Možeš li reći šta je vama košarka, osim medalja, kao grupi donijela?

Košarka je timska igra koja podrazumijeva saradnju i dogovaranje. Osim što nam je donijela lijepe trenutke igre i međusobnog druženja, košarka nam je omogućila da upoznamo i učenice iz drugih škola i da tako proširimo svoj krug prijatelja. Tu su naravno i pobjede na koje smo ponosni i koje nas usrećuju.

Za kraj, pitanje o osvojenim mjestima u ovoj školskoj godini?

U ovoj školskoj godini naša ekipa je osvojila prvo mjesto na Gradskom takmičenju i izborila plasman na Kantonalno takmičenje u košarci za djevojčice.

Redakcija školskog lista *Pazarko* našim košarkašicama želi dobar plasman u narednim takmičenjima.



Zašto bi djevojčice, prema tvome mišljenju, trebale trenirati košarku?

Košarka je veoma zanimljiv sport kako za dječake tako i za djevojčice.

Igranje košarke razvija sposobnost komunikacije, uči nas da pravilno razmišljamo i razvija timski duh. A tu je naravno i druženje sa ekipom.

Intervju sa učenicom Ajnom Nezirovac (V₁)

Ajna je odlična učenica petog razreda, koja je posebna po tome što veoma voli atletiku i u ovom sportu postiže odlične rezultate.

1. Kako se zove klub u kojem treniraš i koliko već dugo?

Treniram atletiku u Atletskom klubu Sloboda Tehograd od svoje četvrte godine. Moji treneri su Kada Delić-Selimović i Jasmin Gavranović.

2. Reci nam nešto o takmičenjima na kojima si učestvovala?

Učestvovala sam na brojnim takmičenjima u

Bosni i Hercegovini, Srbiji i Hrvatskoj. Osvojila sam ukupno 40 medalja i 2 pehara. Takmičim se u trkama na 60 i 200 metara, a veoma sam uspješna i u skoku udalj.

3. Ko su tvoji sportski uzori?

Moji uzori su Amel Tuka i Ivana Španović, s kojima se susrela na takmičenjima više puta. Cilj mi je da postížem velike rezultate kao i oni, zato vrijedno radim i svakodnevno treniram.

4. Koji su tvoji najbolji rezultati?

Ove godine na manifestaciji Šest gradova – šest sportskih avantura koja je okupila veliki broj takmičara iz cijele Bosne i Hercegovine, proglašena sam najboljom atletičarkom u svojoj kategoriji.

Prvakinja sam Federacije BiH za 2022. godinu u disciplinama 60 m, skok u dalj i 4x100 u kategoriji cicibanki, a viceprvakinja na nivou Bosne i Hercegovine.



Ajna Nezirovac

ČASOVI IZVAN UČIONICE

Učenici Osnovne škole „Pazar“ su u utorak 23.05.2023. godine u pratnji nastavnica Nedžmije Hasanbašić i Aldine Pašić posjetili tuzlansku Hadži-Hasanovu džamiju, poznatiju kao Čaršijska džamija u Tuzli.

Učenicima se obratio imam džamije Sifet-ef. Suljić koji im je objasnio kako se zovu sastavni dijelovi džamije, kada je sagrađena, koliko broji džematlija, te koliko bude džematlija na dnevnim i noćnim vaktovima. Nakon kraćeg predavanja, učenici su postavljali pitanja na koja je Sifet-efendija vrlo rado odgovarao. Nakon posjete Čaršijskoj džamiji, Sifet-efendija je učenike počastio sladoledom i zahvalio im se na posjeti.



Iz pera naših učenika

Praznici

Praznici brzo stižu,
Božić i Nova godina.
Veselje u svakoj
kući se sprema,
dobro raspoloženje,
donosi svima.

Jelke su okićene,
lampice svjetlucaju.
Svi se raduju i
poklone pakuju.

Djeca se sankaju
i na snijegu grudvaju.
Raspust rado čekaju,
da mnogo duže spavaju.

Djevojčice i dječaci,
pregršt želja imaju.
Svi se zajedno, veselo
Djedu Mrazu raduju.

Naš Djeda Mraz cijele
godine je vrijedno radio
za nas poklone pakovao.

U radosti i veselju,
djedica želi da ispuni
svaku dječiju želju.

Naida Arnautalić VI-2

Djed Mraz

Ko je onaj deda,
znam ga odmalena?
Kapa mu je crvena,
vidim ga i snena.

Taj dedica veseli,
poklone nam dijeli.
Svakome poneki dar,
ili neki slatkiš bar.

Dedice dragi, dedice mili,
mi smo jako dobri bili.
Čekamo te željno sada,
Puni sreće, puni nada.

Aida Cerjaković, VI-2

Zimska čarolija

Gledam pahulje vesele, bijele,
one su svugdje oko mene.

Kada pahulje padaju s neba,
tada napolje izaći treba.

Čarolija i ljepota to je prava,
jer bijeli snijeg ne prestaje da
pada.

Zimu najviše volim ja,
ona je prava čarolija.

Mia Nezirović VI-2



Iz pera naših učenika

Vlak u snijegu

Vlak se u snijegu zaglavio
kada je djecu iz Zagreba kući vozio.

U vlaku su djeca složna bila
svu hranu na jedan sto stavila.

Zadrugu Ljubanovac su napravili svoju,
i radili složno, sve je išlo kao po loju.

Dječje ručice su vrijedne bile
I od snijega vlak oslobodile.



Jedino Pero ništa radio nije,
on je izdajica, i sad sva zadruga mu se smije.

Najvredniji je Ljuban bio, čak je i
Dragu u rukama nosio i izliječio.

Edin Alibegović, V-1

Duga

Vidim nešto i to sa juga
jedna lijepa i šarena duga.

Kada je gledam puna je boja
i sam ne znam koja je koja.

To je jedan prelijepi sjaj
ali tu joj je kraj.

Harun Sejranović V-1



JEZIK SREDSTVO KOMUNIKACIJE

Studentice II godine Edukacijsko–rehabilitacijskog fakulteta Univerziteta u Tuzli, odsjeka Logopedija i audiologija pod mentorstvom asistentice Nadire Hulusić, bachelor logopedije i audiologije u sklopu praktičnih vježbi iz predmeta teškoće u komunikaciji bilingvalnih osoba, 15. maja 2023.

održale su kreativne radionice po nazivom „Jezik kao sredstvo komunikacije“. Tom prilikom provedene su aktivnosti koje su primjenjive i za djecu bez jezičkih teškoća za bogaćenje rječnika, poput fonoloških vježbi, gramatičkih i gramatičko-leksičkih igara, leksičkih vježbi i sl.

Učenice su uspješno odradile sve pripremljene aktivnosti.



ČASOVI I ZVAN UČIONICE

Učenici V razreda sa učiteljicom Jasminom B. su realizovali čas Kulture življenja izvan učionice. Ugostila ih je Harunova mama u svom frizerskom salonu ”Lady” na Slatini, teta Izeta. Bila je ovo prilika za učenike da bolje upoznaju zanimanje frizera, upoznaju

sve ljepote, prednosti, ali i teškoće koje prate frizera u njegovom radu. Imali su mnogo pitanja u vezi sa održavanjem higijene kose, pitali su koji su šamponi najbolji, te koliko često treba posjećivati frizerski salon. Svi koji su željeli, dobili su novu frizuru. Na kraju su se svi počastili slatkišima i sokom

koji je za njih pripremila teta Izeta. Na kraju smo joj za uspomenu poklonili zahvalnicu, za dobrodošlicu i podršku u učenju.



BILI SMO DOMAĆINI GRADSKOG TAKMIČENJA IZ INFORMATIKE

Da je OŠ „Pazar“ dobar organizator i domaćin školskih takmičenja, pokazala je organizacija i sprovođenje Gradskog takmičenja iz informatike koje je 13. aprila 2023. godine bilo upriličeno u prostorijama naše škole.

OŠ „Pazar“ je imala svoga predstavnika, Marić Adriana, učenika VIII razreda koji je na ovom takmičenju osvojio IV mjesto i time se plasirao na kantonalno takmičenje, koje se 11. maja održalo u prostorijama JU Gimnazija „Meša Selimović“.

Adrian je pod mentorstvom profesora Spahića pokazao izvrsno znanje iz blasti Python i ostavario V mjesto, čime je obezbijedio mjesto u kvalifikacijama za Državnu informatičku olimpijadu (BHOI 2023) koja će se održati u Sarajevu 10. juna.



21. FEBRUAR, DAN MATERNJEG JEZIKA

Širom svijeta se 21. februar obilježava kao Dan maternjeg jezika. Svake godine u našoj školi svi razredi predmetne nastave upoznaju se sa historijatom i značajem obilježavanja ovog značajnog datuma. Svečanom obilježavanju Dana maternjeg jezika prisustvovali su savjetnici Pedagoškog zavoda, a učenici literarne, recitatorske sekcije, kao i mlađi učenici III I IV razreda prigodnim recitalima i pjesmom podsjetili su na značaj njegovanja maternjeg jezika kao i na to da se maternji jezik znanjem voli i da je dom tamo gdje svojim jezikom govorimo.



DAN PLANETE ZEMLJE U OŠ „PAZAR“

Dan planete zemlje se obilježava 22. aprila u cilju podizanja svijesti svjetske populacije o problemima u vezi sa globalnim onečišćenjem i uništavanjem okoliša, ali i pronalaženja najboljih rješenja za njihovu zaštitu. Brinući se za naše vode, šume i zemljište možemo se bolje odbraniti od klimatskih promjena i njihovih posljedica.

Ove godine povodom Dana planete Zemlje JU OŠ „Pazar“ je raspisala literarni konkurs za predmetnu nastavu na temu „Dan planete Zemlje“ uz podršku Ekološkog saveza „Eko-zeleni“. Uz veliki odziv učenika te pregledanih literarnih radova komisija je odabrala tri najbolja rada:

1. mjesto Nezirović Ena VI-2
2. mjesto Nezirović Mia VI-2
3. mjesto Aida Cerjaković VI-2

Učenici su dali i doprinos u likovnim radovima:

1. mjesto Omar Husejnović, Iman Efendić
2. mjesto Naida Ibrahimović, Adi Muratović, Mirza Aljić
3. mjesto Ali Korlatović, Elma Imamović

Svečanost obilježavanja Dana škole

Svečano i raspjevano je bilo 09. maja 2023. godine u sali Bosanskog kulturnog centra Tuzlanskog kantona, gdje su učenici naše škole uz vodstvo svojih učiteljica, nastavnika i nastavnica prigodnim kulturno-zabavnim programom obilježili 86 godina postojanja i rada Osnovne škole „Pazar“. Uz voditelje

programa, učenike VI razreda Ramić Admira i Aidu Cerjaković nizale su se jedna za drugom pjesme, recitacije, ples i igrokazi. Gostima, roditeljima učenika naše škole u ime kolektiva OŠ „Pazar“ obratio se direktor Nožinović Seid istakavši važnost odgojno-obrazovnog rada

kao najplemenitije misije prosvjećivanja mladih umova, podsjećajući da su iz Osnovne škole „Pazar“ izašle mnoge generacije mladih ljudi, koji su danas ugledni i uspješni građani našeg grada i domovine.

Priredbu je otvorio mali hor uz vodstvo učiteljice Sonje Suljaković. Otpjevali su pjesmu „Djeca su ukras svijeta“.



Najmlađi učenici I razreda, koje su pripremale učiteljice Jasna Poljo i Alma Hadžiabdić predstavili su se tačkama „Pačiji ples“ i „Za bolje sutra“. Ugodnim zvucima klavira počastila nas je učenica Naida Smajić koja je za ovu priliku svirala kompoziciju „Marsch“ J.S.Bach.

Prigodnim recitacijama predstavili su se članovi recitatorskih sekcija „Kako rastu djeca“ (pripremila učiteljica Gabrijela Bundalo), „Riječi“ (pripremila nastavnica Meliha Smajlfendić).

Bila je ovo prilika da članovi dramskih sekcija, koje vode učiteljica Natalija Divković i Melika Suljagić, po prvi put dožive izvođenje igrokaza na velikoj sceni BKC-a. Izveli su igrokaze „Želim“ i „Gdje je nestalo znanje“.



Moderni ples mogli smo vidjeti u izvođenju učenica VIII razreda uz popularne pjesme „Bailando“ i „Havana“, a pripremanje ove tačke pratila je učiteljica Džana Kešetović.



Ove večeri, učenik VI razreda Admir Ramić uspio nas je nasmijati kratkim monodramskim prikazom „On meni nema Bosne“, koji govori o aktelnoj temi odlaska naših građana u inostranstvo.

Velike simpatije zaslužili su članovi Folklorne sekcije, kojom rukovodi učiteljica Amira Ćosić. Predstavili su se tačkom „Varoške igre“. Pjesmom „Za milion godina“ pozdravili su nas članovi velikog hora koji vodi nastavnica Vildana Zukić.



Sportski dan

Na terenima Gradskog stadiona Tušanj 30.05. sa početkom u 09:00 sati učenici VI, VII, VIII razreda u pratnji nastavnika i razrednih starješina Osnovne škole "Pazar" realizovali su uspješan sportski dan. Uz želju da pokažu svoje sportske vještine učenici i



učenice VI, VII i VIII razreda učestvovali su u utrkama na 300 i 600 metara za djevojčice, te 300 i 800 metara za dječake te od 10 sati uzeli učešće u malom nogometu i time bili dio današnje Evropske sedmice fudbala, manifestacije sporta, zdravog života i



uključenosti svih, a koje dugi niz godina organizuje Special Olympics Bosnia and Herzegovina (Državno prvenstvo specijalne olimpijade BiH u futsalu i Prijateljsko takmičenje



NOGOMETNI TURNIR

Međuškolski turnir izvršno sportsko društvo, koje je organizovano povodom obilježavanja "15. maja", a koji je zbog loših vremenskih uslova prolongiran i trebao biti realizovan u sedmici proslave dana OŠ "Brčanska Malta", uspješno je realizovan 09.06. 2023. godine.

Prijateljskom turniru su pristupile: organizator JU OŠ "Brčanska Malta", te škole: JU OŠ "Novi Grad", JU OŠ "Solina" i JU OŠ "Pazar".

Nakon odigranih utakmica poredak je bio sljedeći:

1. OŠ "Brčanska Malta"
2. OŠ "Pazar"
3. OŠ "Novi Grad"



UČENIK GENERACIJE



**MELIKA
MRKOVIĆ**

**Generacija
2022/23.godine**

Melika Mrković, rođena je 1.12.2008.godine. Završila je Osnovnu školu „Pazar“ u Tuzli. Od prvog razreda je bila odlična učenica sa primjerenim vladanjem. Tokom svog školovanja bila je članica mnogih sekcija kao što su: Hor, Ekološka sekcija, Recitatorska i Literarna sekcija, Sekcija iz informatike, Košarkaška i Rukometna sekcija. Kao član sekcija predstavljala je školu na priredbama i takmičenjima, te osvojila sljedeća mjesta:

- Ekološka sekcija, 3. mjesto;
- Košarkaška sekcija, 3. mjesto;
- Rukometna sekcija, 2. mjesto.

Osvojila je 1. mjesto na školskom takmičenju iz engleskog jezika, te učestvovala na općinskom takmičenju, na kojem je osvojila 18. mjesto. U IX razredu bila je član ekipe koja je predstavljala školu na „Pub Quiz“ takmičenju iz engleskog jezika, na kojem su osvojili 1.mjesto.

ŠKOLA U PRIRODI

Učenici IV i V razreda naše škole boravili su od 5-8 .6.2023.godine na Muškoj vodi u sklopu realizacije škole u prirodi koja je planirana Godišnjim programom rada škole.

